



Messadi davart la radunanza communal digls 19 da fanadour 2019

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 19 da fanadour 2019.

Protocol dalla radunanza communal digl 1. da matg 2019

Digl protocol dalla radunanza communal digl 1. da matg 2019 ins ò savia piglier invista u tg'el ò savia neir retratg a parteir digls 10 da matg 2019 durant 30 deis an canzleia communal. Ainfer chel termin èn neidas inoltradas nignas protestas. Igl protocol vign damai declaro per approvo e sotta-scretg digl mastral e digl protocollist.

Lescha da votaziun e d'elecziun digl cumeegn Albula/Alvra – Revisiun parziala

Sen proposta dalla suprastanza transitorica Albula/Alvra, on las persungas cun dretg da votar, approvo a caschung dalla radunanza communal digls 14 da fanadour 2014 la lescha da votaziun e d'elecziun digl cumeegn Albula/Alvra. Chesta lescha è antrada an vigour igl 1. da schaner 2015. Aint igl art. 5, *votaziun all'urna*, A. *exposiziun dallas urnas* è nia fixo tgi tar mintga elecziun u votaziun all'urna vegian da neir exponeidas igl minimum set urnas, mintgamai egna aint igls cumeegns uriunds Alvagni, Alvaschagn, Brienz/Brinzauls, Mon, Stierva, Surava e Casti. Tenor igl art. 6, B. *survigilaziun*, stò mintga urna neir surveglada da minimum dus persungas. Igl sacuntigneir da votantas e votants è sa mido considerablamaintg igls davos onns. Dalla consegna persunala digls cedels da votar all'urna vign strousch fatg ple adiever, v.d. passa 90 % dalla votaziun vign fatga per posta. Sa basond a chesta ancuna-schientscha, prevei la suprastanza digl cumeegn Albula/Alvra, d'exponer per mintga elecziun u votaziun all'urna (angal) en'urna ainten la tgesa communal a Casti. Antras chesta maseira pon neir minimos igl grond angaschamaint persunal ed igls costs. Las radunanzas communalas duessan aver li agl avigneir per regla a Casti. Ultra da chegl èn neidas adattadas singulas determinaziuns antiquadas alla practica da screiver odierna. La suprastanza digl cumeegn Albula/Alvra propona d'approvar la revisiun parziala dalla lescha da votaziun e d'elecziun.

Alvagni: Sanaziun dalla «Voia Pro la Fiera»

- Credit brut CHF 390'000.00 (incl. TPV)

La Voia Pro la Fiera sa catta agl vest dalla vischnanca d'Alvagni. Ella scumainza cugl access alla Veia dalla Landwasser e fetta cun l'antrada ainten la zona da vischnanca Gulera. Perveia dall'influenza da schalada, digl sal ed adegna pi grondas tgargias da traffic, è igl stadi dalla surfatscha dalla veia fitg schlet. Cun igl augmaint da traffic sa pegiurescha er igl stadi cuntinuadamaintg, uscheia tgi las lavours da mantignamaint s'augmaintan veaple. Igl tratg tgi duess neir biagia or è ca. 300 m lung. La sanaziun planisada dalla veia cuntigna igl ramplazzamaint dalla surstructura dalla veia. La rasada da fundamaint existenta ò da neir ramplazzada cun ena rasada da fundamaint dad UG 0/45. La drenascha succeda da pran-cepi sur la «spatla», ainten la zona da vischnanca vign l'ava dalla veia rimnada e manada sur la lengia dall'ava meteora aint igl prefluent. Meirs existents, seivs ed amplantaziuns, tgi ston neir rots giu u demontos perveia digls schlargiamaints previas, vignan reconstruias correspondentamaintg aint igl stadi actual.

Igl costs totals per la sanaziun Voia Pro la Fiera montan tenor igl preventiv radond CHF 390'000.00 (surstructura dalla veia CHF 322'000.00, drenascha dalla veia CHF 28'000.00, construcziuns d'art CHF 40'000.00).

Alvaschagn: Revisiun parziala dalla planisaziun locala a «Solas»

Agli vest dalla vischnanca d'Alvaschagn, all'antrada dalla Val Alvra, preveian igls purtaders digl project «Aventura Alvra» la realisaziun dad ena punt cun cabel purtant. Segl li dalla Punt da Solas, en li da valeta istoric-culturala e turistica, tgi magna tranter Tusang e Casti sen en'otezza impressiunonta sur l'Alvra ve, duess neir realiso chel project d'impurtanza turistica per l'antiera regiun. Cumprovas da realisablidad scu er sclarimaints davart effects pusse-bels segl ambiaint èn avant mang. Per saveir porscher la punt cun cabel purtant scu concept cumplessiv turistic, èn previas er adievers da mantel, scu ustareias, center da visitaders, pausadis etc.

La veia d'evenimaint planisada sur la punt cun cabel purtant ed igls adievers da mantel colliias cun chegl, schean, tenor igl plan da zonas vertent, parzialmaintg ainten la zona da biagier (zona industrial, zona d'abitar masdada) scu er aint igl areal da gôt ed ainten la zona digl ulterior territori communal. Igl project tangescha ultra da chegl la zona neutrala qualifitgeida digl patrimoni mundial dall'UNESCO «Veiadafier retica ainten la cuntrada Alvra / Bernina» ed aint igl spazi d'ava dall'Alvra. Per tg'igl project saptga neir realiso, ègl necessari preliminaraintg d'adattar la planisaziun locala. Cun la revisiun parziala dalla planisaziun locala preschentada ed adattada agli project duessan neir stgaffeidas la premissas d'adievers planisatoricas per la realisaziun dalla punt cun cabel purtant scu er per adievers da mantel segl territori da Solas. Schi la realisaziun digl project succeda betg ainfer tschintg onns, scroda la revisiun parziala sainza ena nova decisiun antras la radunanza communal.

**Brienz/Brinzauls: Territori dalla bova e sbuaditsch:
Preproject: Survigilaziun e preavertimaint 2019 – 2024
- Credit brut CHF 910'000.00 (incl. TPV)**

Cun igl project approvo igls 4 da november 2009 davart la «installaziun d'en sistem da survigilaziun segl territori dalla bova Caltgeras» ed igls projects suandonts «preavertimaint 2011 anfignen 2015», scu er la «survigilaziun e preavertimaint 2016 anfignen 2019», è nias installos ples systems da misiraziun, tgi duevan registrar e survigilar igls muvimaints dalla crepla per contanscher ena miglra ancunaschientscha davart igls process percurrias.

Igl project preschaint descreiva la successiun ed optimaziun dalla fasa da menaschi per igl spazi da taimp dalla mesadad digl onn 2019 anfignen igl 2024. Cun igl sistem da survigilaziun e d'avertimaint duessan neir registradas las ratas digl muvimaint dalla bova e digl sbuaditsch, scu er contanscher ulteriouras ancunaschientschas davart igl mecanissem da muvimaint e la chinematica da bovas e sbuaditschs. Cotras duess, tenor pussebladad, neir contanscheida ena prognosa davart l'activitad dalla crudada ed en avertimaint eventual da gronds evenimaints. Igl sistem avertescha automaticamaintg tar en surpassamaint dalla valour minimala. Igl avertimaints vignan interpretos da persungas digl rom ed igl cumegn vigna oriento via cumischung da siertad. Igl costs calculos per igl project montan radond CHF 910'000.00; da chels vignan surpiglias ca. 80 % dalla confederaziun e digl cantun, ca. 12 % digl cumegn Albula/Alvra e ca. 8 % digl Uffezi da construcziun bassa digl cantun Grischun.

**Stierva: Sanaziun «Veia Purgiera»
- Credit brut CHF 300'000.00 (incl. TPV)**

La Veia Purgiera a Stierva scumainza tar la piazza da volver da posta all'antschatta dalla vischnanca e magna agl our sidvest dalla vischnanca vers la val anfignen tar la cruschada cun la Veia Touf / Veia Dinvei. Igl ampren tratg cun radond 70 m anfignen igl spartaveias a Sundelas, è nia renovo igl onn 2014 e stò betg neir sano. Igl rest, radond 150 m, è pero an en schlet stadi. Ainten divers lis ègl donns pi gronds dalla cuvreida e la drenascha dalla veia è manglousa. Ena renovaziun dalla surconstrucziun è urgenta. An chest connex vignan renovadas er las lengias d'ovra tgi sa cattan ainten veia e l'ava persa vigna separada danov (ava persa ed ava meteora).

Igl costs totals per la sanaziun dalla Veia Purgiera montan tenor igl preventiv radond CHF 300'000.00 (construcziun dalla veia CHF 230'000.00, dismessa dall'ava persa CHF 35'000.00, provedimaint electric CHF 35'000.00).